

## Transkription von Urkunde HBS 1392a

Ort, Datierung: Halberstadt, 1392-07-25

Signatur: Stadtarchiv Halberstadt, V 16

Inhalt: Hintze van Hersleue und Ehefrau: Schenkungsurkunde

Ek Hintze van Hersleue bürghere to Halb(e)r(stadt) Hanne sin eylike Husvrowe we bekenne(n) in dissem breyue vor allen / den . de on seyn . eder horen lesen , Dat we anderhalue lodighe mark ingheldes . iarliker gulde , de we vor twintich / lodighe mark gekoft hebben . By den wisen Radmanne(n) . vn(de) der gantze(n) meynheyt der stad to blankenb(or)g(h) . Met gudem / vore rade vn(de) m(et) wol bedaghtem moyde , hebben dorch . god gegheuen . Godde . vn(de) Marian siner leyue(n) moyder to eyne(n) / loue vn(de) to eyner eere , . vnde vnsen seylen . vnser leyuen elderen . vnde leyfhoueden seylen . vn(de) allen kristene(n) seylen / to troste , . Vn(de) ok vm(m)e gnade to erweruende . allen salighen kristene(n) . de des begheren , . Vnde we hebbe(n) de breyue / de we ouer de benante(n) gulde hebben . met wisschop vn(de) m(et) volbord . Der erzamen wisen . Des rades to halb(e)r(stadt) . geantw(er)d(et) / vn(de) bevalen , . Den erliken wisen aldermanne(n) . der kerken sinte merte(n)s to halb(e)r(stadt) . also dat se . de ben(an)ten anderhalue(n) / lodighe(n) mark ingheldes . alle iarlikes . schullen . vn(de) ok gherne willen truweliken . ermane(n) vn(de) vpneme(n) , . Vnde / wedder vtreiken vn(de) gheuen . to deme louesange Salue regina . misericordie etc. Den me de uasten ouer des aue(n)des / pleg(et) to singen . In aller wise . also de breyue . inneholden vn(de) vtwissen . de dar ouer sint gegheue(n) , . Vnde nameliken / alle auende . io dem p(er)n(er)e . iij pe(nninge) . Jowelkem kappelane . ij pe(nninge) , Dem kerken(er)e . ij . pe(nninge) , . Dren schoylere(n) iowelkem eyne(n) pe(nninge) / vortmer . darvan kope(n) . xij . pund wasses vor j m(a)r(k) . konde me sovele wasses nicht kope(n) vor j m(a)r(k) so scholde me / dar to don van deme . dat des voreiares van den kertze(n) ouer bleuen weyre . also weyle dat de kertze(n) io van . xij . pu(n)den / worden So bleue(n) dar noch . vj . schillinge . der schal me ij schilli(n)ge . Dem keln(er)e to dem doyme gheue(n) vor j stoucken / wines , Vnde iowelkem aldermanne . ij . schilli(n)ge vor j sto(u)cken wines . op vnser leyue(n) vrouwen dach in der vasten / Scheghe ok dat desang . forboden wrde dar god vore sy , So scholden de alderma(n)ne . de pe(n)ni(n)ge innebeholden / to des goddeshuses nuð . al de tid ouer . dat me nicht ensunge , . Ok welk orer . de p(er)n(er)e . der kappelane . eder . der / schoylere . to dem louesange nicht en weyre . deme oder den . scholde me . des auendes io nicht gheue(n) , . Dat scholde / ok to des goddeshuses nuð . by den alderma(n)nen bliuen , Scheghe ok dat de Rad to blankenb(or)g , . de ij mark / ingheldes . wedder kope(n) wolden . also se don moghen na vtwiseinge orer breyue So scholden de alderma(n)ne , des / benanten goddeshus(es) sinte merte(n)s . med wisschop vnser heren . Des rades to Halb(e)r(stadt) vn(de) volbord . entfange(n) . vn(de) / opnemen , . Vnde ok met rade der ben(an)ten vnser heren . wedder anlegen . an ij mark ingheldes . vnuortog(et) / oppe dat io dat lof goddes vn(de) marian siner leyuen moyder . deste vollenkomeliker to ewighe(n) tiden . Dar van=/ge oket vn(de) gemeret . moghe werden , . Gescheghe auer . dat de ben(an)te gulde . van roue . van brande . eder / welke wys dat gescheghe . gewoyst(et) wrde . also dat de alderma(n)ne . des tyntzes nicht ermane(n) . kunden . Des god / doch also nicht envoyghe So scholden se . vn(de) ok dat goddes hus sinte merte(n)s . van allermalkeme . vnbededinget / vn(de) vnbeschedig(et) . dar vm(m)e bliuen . Sunder wanne se den tyns ermane(n) vn(de) hebbe(n) ku(n)nen So scholde me io dat / ben(an)te goddes denst , . na . dar van holden . also vore , . . Des to orkund . dissen breyf , besegheld m(it) minem

/ anghehe(n)geden ingheseghel . Gheue(n) na Goddes gebord . dretteyn hundert iar in deme twey  
vn(de) neghe(n)tigheste(n) / iare in sinte Jacobes daghe . des hilghen apostelen , , ,